



Headlines

- लैफ्टिनेंट गर्नर मनोज सिन्हा होरें जम्मू च 100 रोजा “टी.बी मुक्त भारत” अभियान शुरुआत आले कार्यक्रमै च हिस्सा लैता ते तपैदिक दे खलाफ इस जन-आंदोलन दा आहवान कीता।
- जम्मू-कश्मीर सरकार नै शैहरी इलाकें आस्तै इक ज्हार 162 करोड़ रुपें दी लागत आहली कचरे दे प्रबंधन सरबंधी परियोजना गी मंजूरी दिती। मुख्मंत्रि उमर अब्दुल्ला होरें इस गैंड गी शैहरें आस्तै स्वच्छ ते स्वस्थ करार दिता।
- मुख्म सचिव अटल डुल्लु होरें जम्मू-कश्मीर च ईंधन दे भंडार दी स्थिति दा जायजा लैता ते पर्याप्त उपलब्धता दा भरोसा दोआया ते ईंधन जमा करने आहलें खलाफ सख्त कारवाई दे निर्देश दिते।
- सन्नासर च जम्मू दा सबनें थमां बड्डा ट्यूलिप गार्डन अज्ज लोकें लेई खुल्ली जाहग।
- वंदे भारत रेल रुट च बदलाव कीता गेआ ऐ। कटरा थमां अमृतसर औने-जाने आली एह ट्रेन हून गुरदासपुर ते बटाला थमां होंदे होई गुजरोग।



LG-TB Mukht Campaign

लैफ्टिनेंट गवर्नर मनोज सिन्हा होरें जम्मू च 100 दिनें दे “टी.बी. मुक्त भारत” अभियान गी शुरु करने सरबंधी कार्यक्रमें च कल हिस्सा लैता। एल.जी होरें टी.बी खलाफ इक बड्डा जन-अभियान चलाने दी गुजारश करदे होई जांच दे कम्में च तेजी आहन्ने- घर-घर जाइयै लोकें गी जागरुक बनाने ते सामुदायिक भागीदारी जकीनी बनाने लेई आखेआ- तांजे इस गल्लै गी पक्का कीता जा जे टी.बी. दा कोई बी मरीज खुंजी नैई जा। केन्द्री सेहत मंत्री जगत प्रकाश नड्डा हुंदे आसेआ रम्भेआ गेदा एह राष्ट्र व्यापी अभियान टी.बी. दे पूरी चाल्ली खात्में पर केन्द्रित ऐ। एल.जी होरें इस मौके पर सम्बोधन च सबनें सरबंधत धड़ें गी गुजारश कीती जे ओह इस गल्लै गी जकीनी बनान जे जम्मू-कश्मीर इस अभियान च इक अगुआं प्रदेश दी भूमिका निभाए। उनें



CM -Waste Management

जम्मू-कश्मीर सरकारै कुल इक ज्हार 162 करोड़ 40 लक्ख रुपें दी लागत कन्नै अनंतनाग- मट्टन-बिजबिहाडा कलस्टर- कठुआ- हीरानगर- परोल- लखनपुर कलस्टर ते जम्मू ज़ोन-3 ज्नेह महत्वूर्ण शैहरी कलस्टरें लेई ठोस कूडे-कचरे दे प्रबंधन आली संगठित सुविधाएं दे निर्माण दी मंजूरी देई दिती ऐ। इस प्रोजैक्ट दा मकसद कचरे गी साईसी ढंगै नै खपाना- घरेलू ते औद्योगिक कचरे गी बक्ख करना ते कचरे कन्नै परतियै इस्तेमाल जोग-चीजें दा निर्माण जकीनी बनाना ऐ। एहदे नै मेद ऐ जे शैहरें च साफ-सफाई आले सरिस्तें च सुधार होग ते पर्यावरण च बी बेहतरी होग। मुख्मंत्रि उमर अब्दुल्ला होरें सोशल मीडिया दी इक पोस्ट च आखेआ ऐ जे एह

पैहलकदमी- कचरे दे प्रबंधन आली प्रणालियें गी अज्जै-कल्लै दे स्हाबै दा बनाने ते साफ-सुथरे ते सेहतमंद शैहरें दे निर्माण दी दिशा च पुट्टी गेदी इक महत्वपूर्ण गैऽ ऐ।

<><><><><><>

CS-LPG Supply

मुख सचिव अटल डुल्लु होरें जम्मू-कश्मीर च पैट्रोलियम उत्पादें दी उपलब्धता ते बंडू सरबंधी प्रणाली दा कल इक बैठक दरान जायजा लैता। इस मौके पर उनें गी जानकारी दिती गई प्रदेश च पैट्रोल- डीज़न ते एल.पी.जी दा सुद्दा भंडार उपलब्ध ऐ ते सबनें जिलें च बंड प्रणाली बी बवस्थित ढंगै नै कम्म करा'रदी ऐ। मुख सचिव होरें जमाखोरी- कालाबजारी ते मुनाफाखोरी करने आलें खलाफ सख्त कार्रवाई दे निर्देश दिते। डुल्लु होरें ईंधन सरबंधी ढांचे गी तगडा बनाने ते प्रदेश दे सबनें जिलें च उपभोक्तां गी निर्विघ्न सप्लाई जकीनी बनाने आस्तै गैस-पाईपलाइन परियोजना गी तौले सबूरा करने दी जरुरतै पर ज़ोर पाया।

<><><><><><>

DIG -Kathua Visit

जम्मू-साम्बा- कठुआ रेंज दे पुलस दे DIG शिव कुमार शर्मा होरें जंदे रोज कठुआ जिले दे बनें आहले इलाकें दा व्यापक दौरा लाया ते इस इलाके च पुलिस बलें दी सुरक्षा स्थिति ते अभियानें सरबंधी तयारियें दी समीक्षा कीती- कठुआ दियें SSP मोहिता शर्मा ते होरनें अफसरें दे कन्नै उनें संवेदनशील थाहरें दा जायजा लैता ते बक्ख-बक्ख थाहरें पर तैनात पुलस दे जोआनें ते ग्राम सुरक्षा गार्ड दे सदस्यें कन्नै गल्लबात कीती। उनें खास तौरा पर रातीं दे समें च नाकाबंदी करियै जांच गी तेज करने ते बने कन्नै लग्गदे इलाकें च सरगर्म राष्ट्र विरोधी तत्वें खलाफ निगरानी होर तेज करने दे निर्देश दिते ना। DIG होरें BSF दे अधिकारियें कन्नै बी मलाटी कीती- तांजे आपसी तालमेल गी निगगर कीता जाई सकै। उनें बने कन्नै लग्गदे इलाकें च सुरक्षा गी यकीनी बनाने लेई मते सारे सुरक्षा सरबंधी उपायें पर बी चर्चा कीती।

<><><><><><>

UNHRC J&K

बडगाम दे इक मशहूर मानवाधिकार कार्यकर्ता जावेद बेग ने जिनेवा च संयुक्त राष्ट्र मानवाधिकार परिषद दे 61में सत्र च मती सारी आतंकवादी घटनाएं च गंभीर मानवाधिकार उल्लंघनं पर लौऽ पाई। मीडिया कन्नै गल्लबात करदे होई बेग होरें आखेआ जे उंदा सम्बोधन त्रै मुख चैंताएं पर केन्द्रित ऐ। उनें पैहलगाम ते दिल्ली च आतंकवादी हमले- पाकिस्तान दे कब्जे आहले जम्मू-कश्मीर POJK- ते पाकिस्तान दे खैबर पखतूनख्वा इलाके च कथित तौरा पर अत्याचार बारे गल्ल कीती। उनें अगगे आखेआ

उआं UNHRC दे 61में सत्र च ECO –FAWN सोसाइटी दे इक सदस्य यासर लारुसी होरें बी जम्मू-कश्मीर च आतंकवाद ते खासतौर पर पिच्छले बरे 22 अप्रैल गी पहलगाम च होए दे जानेलवा हमले दा ज़िकर करदे होई जम्मू-कश्मीर च आतंकवादी दे खतरे पर अंतराष्ट्रीय तौरा पर ध्यान आर्षित कीता।

<><><><><><>

Sanasar Tulip

जम्मू दा पैहला ते सबनें शा बड्डा सन्नासार घाटी आला ट्यूलिप गार्डन अज्जै थमां आम लोकें लेई खोलेआ जा'रदा ऐ ते मेद ऐ जे एहदे नै खित्ते च सैलसफा गी होर बढावा मिलोग। साढे रामबन जिला संवाददाता दी रिपोर्ट मूजब 35 कनाल शा मते रकबे च फैले दे इस ट्यूलिप गार्डन च 25 बक्ख-बक्ख किस्में दे 2 लक्ख शा मते ट्यूलिप दे रंग-बिरंगे फुल्ल खिडे दे न। फुल्लें दी काशत आले मैहकमे नै लोकें दी आमद दे मद्देनजर सब्बे बंदोबस्त जकीनी बनाए दे न। इस सरबंध्यै च आकाशवाणी समाचार कन्नै गल्ल करदे होई रामबन दे Assistant Floriculture Officer पवन कुमार होरें आखेआ

<><><><><><>

Vande Bharat Route Change

उत्तर रेलवे नै श्री माता वैष्णो देवी कटड़ा ते अमृतसर बश्कार चलने आली “वंदे भारत एक्सप्रेस” लेई रुट च तब्दीली दा ऐलान कीता ऐ। एह ट्रेन अपने पैहले आले रुट जलंधर दे बजाय हुन गुरदासपुर ते बटाला दे राहें आ-जा करोग। इस हीले दा मकसद जात्तरा दे समें गी घट्ट करना ते सम्पर्क च सुधार करना ऐ। एह ट्रेन हुन अपने सफर दरान जम्मू- पठानकोट कैंट- गुरदासपुर ते बटाला च किश चिरै लेई रुका करोग। सरबंधत अधिकारियें आखेआ ऐ जे इस तब्दीली दे कन्नै जात्तरिणं- खासतौरा पर श्रद्धालुणं गी लाह हासल होग ते कन्नै जात्तरा बी सखल्ली बनोग। नमें सिरेआ कीते गेदे एह हीले तौले गै लागू करी दिते जाडन।

<><><><><><>

Yuva Parliament

युवा मामलें ते खेड्डें सरबंधी मंत्रालय दे तैहत “मेरा युवा भारत जे एंड के” आसेया जम्मू-कश्मीर विधानसभा च विकसित भारत युवा संसद दे प्रदेश सतह दे राउंड दी कामयाबी कन्नै मेज़बानी कीती गेई। इस कार्यक्रम दी प्रधानता मंत्री जावेद राणा होरें कीती ते इस मौके पर उ'नें राश्ट्र-निर्माण च युवाएं दी भूमिका उप्पर लौऽ पाई। अमित कटोच होरें पैहली थाहर हासल कीती जिसले के हिमान्या पुरी दुई थाहरा ते भावना शर्मा त्रीऽ थाहरै पर रेइयां। इस कार्यक्रम दे जेत्तू हुन राश्ट्री सतह दे राउंड च जम्मू-कश्मीर दी अगुआई करडन। इस सरबंध्यै च अपने बचार सांझे करदे होई इक सरबंधत अधिकारी नै आखेआ

<><><><><><>

SMVD Yatra

चेत्तर नरातें दे पावन पर्व दे दरान श्री माता वैष्णो देवी जी दे दरबार च मत्था टेकने लेई देशै दे बक्ख-बक्ख हिस्सें थवां खरी मती गिनतरी च श्रद्धालु उत्थे पुज्जा करदे न। अधिकारिक सूत्तरें मूजब- नरातें दे शुरुआती दिनें दरान 2 लक्ख 40 ज्हार श्रद्धालु माता वैष्णो देवी जी दे दरबार च मत्था टेकी चुके दे न ते अजें बी खरी मती गिनतरी च श्रद्धालुणं दा उत्थे पुज्जना बरोबर जारी ऐ। एहदे शा पैहले श्रद्धालुणं दा बडा मता रश होने करी किश पाबंदियां लाइयां गेइयां हिआं- पर हुंन जात्तरा बवस्थित ढंग्गै नै चला करदी ऐ ते भीड दे प्रबंधन आले हीले लागू कीते गेदे न। जात्तरा गी सुरक्षित बनाने लेई सुरक्षाकर्मियें- मैडिकल टीमें ते होर दुए अमले दी तैनाती कीती गेदी ऐ।

<><><><><><>